

## Kulturbete

# Utnytt potensialet

Rett beitetrykk og rett fordelt gjødsling gjennom heile beitesesongen er grunnlaget for gode avlinger på kulturbete. Då må sjølv sagt god drenering og kalktilstand, og effektiv ugraskamp, liggja i botn. Det er mange som ikkje utnyttar potensialet i kulturbete godt nok.

Bv

Dag Raustein

Jostein Eiane på Sokn i Rennesøy driv saman med resten av familien nær 400 mål kulturbete – i tillegg til like mykje dyrka jord. Over helvta av arealet er leigd. Rundt 30 mjølkekyr og 350 vinterfôra sauer omset graset til mjølk og kjøt.

Jostein tok hovudoppgåve innan bete då han studerte ved Norges Landbrukskule. Sentralt i denne hovudoppgåva stod registrering av avlingspotensialet i kulturbete. Etter at han og familien overtok heimegarden hans i 2004, har han fått praktisera det han kan om bete. Vi besøkte garden saman med tidlegare fylkesagronom i plantearv og betebruksjef i Rogaland, Einar K. Time, for å få kunnskap om korleis kulturbete skal driftast. Jostein fortel at Einar K. Time var hans viktigaste lærermeister då han arbeidde med hovudoppgåva.

14



Einar K. Time, til v. og Jostein Eiane konstaterer at det er ein allsidig og god grasflora i dette kulturbeitet, med godt innslag av fleirårig raigras.

### Stort avlingspotensiale

Grunnlaget for hovudoppgåva var registrering på fire gardar, to i Rennesøy og to i Sandnes. Vi skal her ikkje gå nærrare inn på registreringane, men bare trekkja fram nokre av konklusjonane. Beite med innslag av fleirårig raigras gav høgare avling enn bete utan dette grasslaget. Raigraset finn ein mest av opp til 200 m over havet.

Registreringane blei utførte ved å slå graset fire gonger gjennom sesongen, og ikkje ved beiting. Ved å slå får ein høgare avling enn det dyra tek opp ved kontinuerleg beiting. Einar K.

Time fortel at ein ut frå gamle forsøk kan rekna med at det dyra tek opp ved kontinuerleg beiting, ligg på 50–70 % av det ein måler ved å hausta ved slått.

På dei beste felta blei det registrert avlinger på over 800 FEm pr. mål netto beiteareal. Det gir eit potensiale ved beiting på over 500 FEm pr. mål nettoareal. Kor mange bønder greier å utnytta dette potensialet? Jostein Eiane er ein av dei som gjer det han kan for å greia det, og vi let han forklara oss dei viktigaste prinsippa han arbeider etter når det gjeld betebruken.

### God jord- og plantekultur

- Mykje av beta er småkuperte, og med fjell i dagen på store delar. Der gir plasseringa av grøftene i dei lågaste sokka seg sjølv. Vi har elles prøvd å utnytta grøftevatnet slik at det blir samla opp i utløpet av grøftene og brukt som drikkevatn til dyra. Det lettar arbeidet med vassforsyning til dyra, forklarer Jostein, som legg til at det er viktig å få bort vatnet for å redusera trakkskader



Svært fine og ugrasfrie kulturbeite som er holdne godt nede gjennom beitesesongen. Her er vi sist i juli.



Sambeiting mellom storfe og sau har mange fordeler. Det gir høve til å regulera beitetrykket og dyreslaga et ulike delar av beitegraset.

og for å halda leverikten borte. Einar K. Time understrekar gamal lærdom: - Kulturbeita skal vera like godt drenerete som dyrka jord.

Ugraskampen er viktig. Også her gjeld det å gjera dei rette tinga. Om vi tek føre oss fire av dei viktigaste ugrasa, så seier Jostein det slik: - Høy-mola og landøyda tek sauene seg av og eg tenkjer ikkje på dei. Tistelen må takast alvorleg. Det er myrtistel som dominerer her. Mi erfaring er at etter effektiv kamp i 10 år, med punktsprøting og stikking, er det lite att. Der det blir sambeita, blir gjerne myrtistel og brennesle brysame, men er under kontroll. Også hjå oss registrerer vi at lyssiv/knappsvi er på frammarsj, men med å sprøyta før det får overtaket, er sivet relativt lett å halda i sjakk.

Vi registrerer at beita ser sær finne ut med omsyn til drenering og ugras.

- Eg tek jordprøvar med visse mellomrom, og kalkar når pH kjem ned mot 5,5. Eg prøver å halda pH på 6 – 7 og brukar skjelsand som kalkingsmiddelet, seier han om den saka.

### Drift av beite tilpassa areal og dyr

- Det er klart at det blir forskjell på drift av kulturbeite til sau om ein sender sauene til heiebeite, eller om dei går heime heile sommaren. Fordelinga mellom kulturbeite og dyrka jord avgjør korleis ein driftar kulturbeita, og kor mykje ein må beita på dyrka jord. Dyreslaga som beitar, spelar også inn i høve til korleis ein skal drifta beita for

å få mest mogleg ut av dei, innleier Jostein om korleis han sjølv praktiserer beitebruken.

- Vi har funne at kontinuerleg beiting på kulturbeita passar best for sauene. Stripe- eller skiftebeiting passar betre der det er sambeiting med storfe, eller storfe aleine, fortel han.

- Vi bruker husdyrgjødsel på beita om våren. Denne må ut så tidleg som mogleg. Husdyrgjødsla har lang verknadstid og gir god vekst. Gjødsling med mineralgjødsel gjennom sesongen blir fordelt på tre til fire gonger. Ved gjødslinga i mai bør normalt N-gjødslinga ikkje vera for sterkt, for då er veksten god nok likevel. Til vanleg bruker eg NK-gjødsel første gongen etter husdyrgjødsla, men av og til ei NPK-gjødsel i staden. Resten av sesongen nyttar eg rein N-gjødsel. Tal gjødslingsar og gjødselmengder blir tilpassa noko til avlingsnivået den aktuelle sesongen, men normalt ligg vi nok på ei samla N-gjødsling på 20 – 25 kg for heile sesongen, husdyrgjødsla inkludert, seier han vidare.

### Viktig i mai/juni

- Vi slepper sauene på beite så tidleg som råd er. Til vanleg blir det i førstninga av april. Sauene lammar inne, og blir først sleppte ut etter lamming, forklarer Jostein.

- I mai/juni er beiteveksten på topp. Om ikkje beitetrykket er høgt nok til å halda beita godt nede til ei kvar tid då, og graset blir for langt, øydelegg ein for

heile resten av sesongen. Eller sagt med andre ord: Det må vera nok dyr heile tida. Her hjå oss løysar vi det med å sleppa inn storfe på kulturbeita mai/juni, for så å ta dei bort derfrå når sauene seinare greier å halda beita nede. Då blir det eit samspel mellom bruken av kulturbeita og bruk av dyrka jord som beite. Dei som sender sauene på heiebeite, må finna løysingar som gjer at kulturbeita blir haldne nede i heiebeitesesongen, anten med storfe, eller ved å halda att nok sauar heime, understrekar han.

- Eg regulerer beitetrykket ut frå grashøgda til ei kvar tid. Når eg nyttar storfe, nyttar eg den gamle omrekningfaktoren på eitt storfe = 10 sauar/lam, fortel han.

- I utgangspunktet har vi alle sauene på kulturbeite, og så nyttar vi storfeet til å ta toppane i tilveksten av beita. Storfe er effektive når graset nærmast seg å bli for langt til at sauene beiter det ned. Dersom ein vil nyitta stripe- eller skiftebeite, er sambeiting effektivt, mellom anna ved at storfeet tek det lengste graset. Sauen er effektiv til å beita graset rundt kurukene, gras storfeet ikkje tek, avsluttar Jostein Eiane.

Ein skal ikkje ha reist så mykje her på Sørvestlandet for å sjå at det er mange som har svært mykje å henta i betre utnytting av kulturbeita sine. For mange ligg kanskje det største potensialet i betring av gardsdrifta akkurat her.